

Eskerrik asko, Lendakari jauna, izentau egin nozulako zeure ordez Amerikara juateko: alegiñak egin dodaz neure lana ondo betetako eta orain eta beti emen nago Euskaltzaindia eta geure euskerearen alde ekiteko. Biotzez besarkada sutsu bat.

C. de Uriarte.

BAYONAKO BATZARREAK

Bayona-ko Musée Basque-n batzarre batzuek izan dira eskoletako irakasbideez iru egunetan. Ain zuzen ere, aurrerapide aundiak egin dituzte, euskera eskoletan sartzeko legearen bidez, Bidasoaz gorako euskaldunak. Azkenengo egunean, arratsalde, Eppherre jaunaren Euskaltzaindian sartzea egin zan Euskaltzaindiak batzarre egiriko bat egini. Ona emen Euskaltzaindiaren agiria:

«Baionan, Musée Basque-n, 1959-VIII-29.

Eppherre jaunaren sarrera itzaldia.

Maipuruan egozan: buruzagiaren orde Dassance jauna, eta Oleaga, Gorostiaga, Lojendio, Lecuona, Villasante, Elissalde, Arrue, Irigaray, Michelena ta Lafitte jaunak.

Ainbat urgazle egozan entzuleen artean.

Oleaga jaunak emoten ditu arautegiaren zeaztasunak eta diño zelan bi euskaltzainiek ekarri bear daben euskaltzain barria. Irigaray ta Arrue joan dira dei egiten eta guztion aurrera dakarre. Dassance jaunak berba batzuk esan eta Eppherre jaunak egin dau itzaldia. Elissalde jaunak erantzun deutso. Arrue jaunak esan ditu azkeneko berba bizi batzuk. Eskuia emon jako euskaltzain barriari eta makilla bat eskeiñi.

An gengoan euskaltzain ta entzule guztiak ago batez «Gernikako Arbola» kantau dogu.»

BIZKAIKO BERTSOLARIEN BIGARREN SARIKETEIA

Uda osoan ekin da Bizkaiko Bertsolarien Bigarren Sariaketa egiten. Aurten Bizkaia bost zatitan partitu da eta toki bakoitzetik txapelkun bat atera da Bilboko azken txapelketa nagusirako. Valentin Enbeita igazko txapelkuna, libre gelditzen zan Bilborako. Txapelketak egin diran erriak auek dira. Urkiolan, San Antonietan, bagillaren 13-an. Bost bertsolarik parte artu zuten eta Jose Alberdi Mañarian bizi danak irabazi zuen. Mungian. San Pedro bezperan, bagillaren 28-an. Zazpi bertsolarik parte artu eta Juan Ormaeche Larrauri-koa txapelkun. Bermeon, San Pedroetan, bagillaren 29-an. Bost bertsolarik parte artu eta Deunoro Sarduy Muxikakoa txapelkun. Markiñan, Karmenetan, garrillaren 18-an. Zortzi bertsolarik parte artu eta Juan Azpillaga Ondarrun bizi dana txapelkun. Zeanurin, Andra Marietan, agustuaren 15-ean. Iruk parte

artu eta Basilio Pujana bertako semea, txapelkun. Errietako sariak auek ziran: Lendabizikoa milla pesetako eta Ayuntamentuaren kopa alkatearen estutik artua. Gaiñerako guztiak hosteun peseta bakoitzak. Zeaturin bertako familia batek emanikako kopa bat ere izan zan puntua ondoen bukatzen zuen bertso-lariarentzat eta Jose Maria Arteche-k irabazi zuen.

Txapelketa auen inguruan, egin dira beste toki batzuetan ere, sariketarik kanpo. Ondarrun Agustuaeren 16-an bertako Ayuntamentuak jarri zuen sariketa bat joan nai zuten bizkaitar guztientzat eta Juan Mugartegui-k irabazi zuen Azpillaga-ren aurretik gelditurik. Urrengo egunean Bilborako aukeratuta zeuden bertsolariak ekitaldi eder bat egin zuten Geruñan alkar probatu eta gertatzen ziran bitartean. Eta azkenez allegatu zan Bilboko, Agustuaeren ogetaamarrerako izendatua zegoan Ayuntamentuak prestatzen dituen Bilboko jaien barruan, baiña altabozakin estrooso bat izanik aste bete atzeratu bear izan zan. Bilboko Arenalean amar milla personatik gora zeuden Bizkaiko erri askotatik etorriak adi adi entzuteko bertsolarien ateraldiak eta zuurtasunak. Valentin Enbeita-k irabazi zuen txapela. Artaz gaiñera Bizkaiko Diputazioaren kopa nagusia, eta Bizkaiko Ahorro Kaxa-ren iru milla peseta. Bigarrena Azpillaga-k, Bilbaiko Ahorro Kaxa-ren kopa ederra eta milla peseta. Gaiñerako guziak, herriz, milla peseta bakoitzak.

Bizkaiko Ahorro kaxa-k Bilboko sariak gaiñera amar milla peseta eman zituen errietako sarietarako.

Bilbon azken txapelketa nagusia egin zan egun berean, goizean, Lekeition izan ziran seirak. Eta azkenez urrillaren 11-an Durangoko frontoian, eta egun artan txapelketetan parte artu zuten bertsolari guziak, juradukoekin batera, bazkari bat izan zuten Hotel Alzaa-n, batzarre polit bat gertaturik.

Bilboko azken txapelketa nagusian Euskaltzaindiak euskeraz ta erderaz orri bat zabaldu zuen. Ona emen ziona, euskeraz:

«Euskaltzaindiak Bizkaiko Bertsolarien Bigarren Sariketaren amaieran eker beroak emoten deusiez Bizkaiko Diputaziño, Bilboko Ayuntamiento, Bizkaiko Ahorro-kaxa, txapelketak egin direan errietako alkate jaun, eta baita euren ekintzeagaz gure izkuntzearen edertasun oneri bizia emoten alegindu direneri.

Gure erriaren aberastasun au gordetan alegiñak egin doguz orainarte, eta komeni danean be bardin ekingo deusagu, izkuntzea zainduteko, gordetako eta aberastuteko benetako gogoia iminirik. Gura geunke gure ekintza onek euskaldun guztiak batuteko balio daien, edozein dala bere pentsetako modua eta bizimodua, guztiona dalako gure aurretikoengandik artu dogun aberastasun parebagea.

Guztieri dei egiten deusagu eta baita euskaldun eztireaneri be, gugaz bizi izanik eurenak lege artzen dituezalako gure gauzak.

Gure gurasoen izkuntzea gordetako lan egitea eskubideagaitik lan egitea da, eta baita berezko gauza batagaitik be.»